

摘藻堂四庫全書薈要

集部

欽定四庫全書薈要

集部

唐文粹卷十九

二十

詳校官候選知縣臣吳甸華



欽定四庫全書薈要卷一萬九千八百三十六

集部

唐文粹卷十九上

宋姚鉉編

頌甲 總六首

盛德大業

無疆頌 李華

起義堂頌 僧一行又云張說

開元正厯握乾符頌 張說

上黨舊宮述聖頌

龍池聖德頌

張九齡

靈武受命宮頌

楊炎

無疆頌并序

李華

臣華言伏以漢明帝時徼外蠻夷樂木白狼獻詩歌德
屬事史官況臣自曾祖至臣備國家職員臣又逮事玄
宗肅宗今以餘年獲事陛下官厯御史補闕尚書郎命
薄多病不獲奔赴闕庭恐先朝露同於泥塵若無歌詩
頌德曾蠻夷不若也敢述列聖為無疆頌式昭皇家大

慶無窮謹昧死稽首以聞

高祖元頌

昊昊旻天監於下興有德維隋之杪時黷陰凝陽潛未
登人思照矣雷行龍興盪濯零慝文明乎萬國垂仁蒸
人載親天監保我子孫巍巍皇皇後之皇丕承之

太宗烈頌

高祖受天命誕興太宗成天之命帝煬昏逾黎人毒痛甚
爇于爐甚溺于塗以號以呼呼天無辜高祖謂太宗爾必

有天下爾其訏謨太宗稽首恭受天命臣請滌除張我師
撫征四國翦薙羣慝鼓一方三方震驚默昭其靈隨顧而
平我負我乳我安我成以奉君父以臨天下任忠孝文武
建禮章樂舞我雖明德諫則納汝時惟帝降佑之自古明
后莫如我德我勛唐無疆天子之無疆本太宗休命

高宗康頌

肇為址為堂實勒實勛付俾厥裔丕承后帝思不忘神
集靜康不耀而光不求而昌自中方外達夷羌瞻我大邦助

祭在于廟執貢朝于王油油時雲雨厥百穀濇濇景風扇
彼嘉穀飴口飽腹以厭以足俾壽而福都阜成天人

中宗興頌

屏蠱之毒豐而為蝮謀虐天之族天祐聖祚八柱將覆帝
告五臣保翼朕躬赫赫彤彤日升雲中百臣受命鉞爾頑
克故曰再造我天下生人鼓舞既成矣又奉父母

睿宗德頌

后戚之禍再興有危兢兢廟祧震怒陰命聖子翼登聖父

奮其神旅宵杖金斧殄殲逆亂大聖照臨元元宅心歸祚
于有功有德於戲盛德

玄宗文頌

丕鑠玄宗之明克孝克仁允武允文宣祖宗之光垂于子
孫盛禮畢舉大樂畢陳百蠻來賓元元阜殷戎或不賓遣
師徂征罔不頓顙蹈于雷霆在漢方昌用刑慘酷中都繫
考六萬餘人使者案錄誅千萬人其後賢王光武赫赫誅
沛賓客以千以百孝明稱賢楚獄連年坐死逮捕以萬以

千猶曰漢祚宜長越我祖宗不忍用刑至于玄宗哀彼銖
鎰降為鞭撻誕告郡國大為屋室醫彼百疾追懷登遐止
害禽畜旁為陂池養鱗介族既濡既渥昆蟲草木享國五
十年寓縣宴然逆臣犯天天念蒸人若曰寧我負恥不忍
人戰死乃告元子理兵朔鄙西幸蜀都命元子受圖天下
既定父堯子舜歸于國都無不欣愉無不涕濡傳聖自順
升靈太微嗚呼上聖之道之純不可度思

肅宗孝頌

穆穆孝慈有如肅宗之誠達于神祇爰訓六師震發北陲
陵陵雷馳西戎南蠻北狄東夷咸舉其旗佐皇之威帝
心如天無噬無慾自然丘岳破裂崖谷逆隸傾覆朝社
大復居于海之外服以盥以濯以舞以躍帝在東宮孝
如文王蒸蒸其心天地知其孝既收鎬洛祀于陵廟奉
迎上聖天日並照有兇有孽將噬將齧我旗方設則已
顛蹶如燂於雪尊嚴而仁仁覆而嚴大臣小臣莫不潔
廉躬勤百度百度如其素

今上照頌

大邦之興維天相之昌興昌相有德繼王昔殷王盤庚
武丁紹登殷明矧我帝君丕承天命疊引其慶生我皇
聖幼冲聖敬實左右肅宗開國御戎羣師稟教舉則成
功自西自東如霆如風蕩滌元兇罔不率從既登大位
於變時雍人咸曰上如太宗延億兆斯年地博天崇罔
不爾容玄宗元孫為玄宗烈文肅宗元子承肅宗孝理

起義堂頌

并序

僧一行

又云
張說

堯以天下禪舜舜以天下禪禹禹將宅百揆摠萬國一讓
于稷禹再讓于皋繇稷禹先舉彼商與周以之更盛皋繇
後天我國家於茲受命非舜以考天而疇咨審靈命之陰
隲非禹以享天而德讓知厯數之有歸及乎玄元間出光
大前慶垂道德而統運依清虛而立法天祚我李厥惟舊
哉并州起義堂者皇天造帝之初高祖誓衆之地也隋氏
失御國亂無家小道自賢大才胥忌惟宮室陂池之好惟
沈湎暴慢是保上帝不歆黎人咸戚六軍踰海而東敗萬

乘過江而南覆豺狼入邑狃偷爭人黔首囂然方將無訴
我高祖感之乃龍躍晉水鳳翔太原百神前驅萬姓來奔
開咸陽入天門用湯武之兵靜新室之亂遵唐虞之典承
太王之基率百官受終于文祖輯五玉班瑞于諸侯類圓
裡方之禮備封功爵德之議允約法惟簡代虐以寬子惠
困窮懷柔蠻貊金石一變日月重華近古以來未有革命
易姓若此之盛者也非天私我有唐惟天祐于積德非唐
求于人庶惟人懷于累仁當此之時太宗內啓聖謀外行

專斷躬擐甲胄跋履山川駕英雄而為興主一區域而定
大業周詩曰昊天有成命二后受之信今之謂也若夫脩
德以降命奉命以造邦源濬者流長根深者葉茂天人報
應豈相遠哉觀周之興始於后稷公劉承以大王王季皆
勤儉忠厚克廣前烈至于文王成之武王啓之康王安之
故卜世三十卜年八百天所命也我唐之興也始於皋繇
玄元承以景皇元帝皆立言邁德垂裕後昆至於高祖受
之太宗有之高宗守之中宗復舊業睿宗新景命比之周室

我何謝焉且如陳德明刑庶其躬稼之績玄宗道要小其
避狄之仁化流率土狹其江漢之域義寧大朝羞其牧野
之戰故武德中太行出大聲曰唐興理萬年蓋天之所命
年代未可涯也仲尼曰惟天為大惟堯則之又曰韶盡美
矣又盡善也非至德其孰能如此其大者乎於戲先后捨
元子而立予主鬯煩大位而付予天下自高祖創業百有
六戰欽承丕緒十有四載東西南北無思不服山川鬼神
亦莫不寧實惟藝祖儲福之所致豈予幼孫菲德之能及

方將運心于玄妙之境勵志于造化之爐發令為祥符施
惠為霖雨任賢為兩曜仗能為四時俾溥天之下有形者遂
全懷生者自足樹鋪野繭田種嘉穀斲雕為樸捐珠棄玉
追大庭而齊風夢華胥而同俗非曰能爾願憑宗祏而效
焉癸亥之歲獻春正月濟河橫汾省方展義存問黎老緬
慕本邦城郭歸然桑梓如舊覽風物之憂思尋王業之艱
難惟高祖若天地之開闢化成萬類惟太宗若日月之照
臨光于四表舉晉陽之甲除君側之盜由唐侯之封升天

予之號肇基發迹實在于茲仙駕無所或顧懷于舊土
靈魄無方儻來歸于此堂郡縣之所宜嚴奉前人有言
曰禮不忘本樂保其德如姬詠周原而劉歌沛邑思我
烈祖如聞歎息之音嗟爾後人無忘成功之頌頌曰

皇矣上帝臨下有赫降監四海求人之瘼吁彼隋煬其
政不獲眷我高祖此惟其宅天輔皋繇明刑弼教道尊
老氏同玄體妙仁表四孔明融獨照隨父託心史良辨
貌高祖誕靈神光夜耀天妹作合日兄夢紹祚生文帝

膺運會昌首唱高祖騫飛晉陽萬夫一心元戎啓行火
旗炎炎雲鳥洋洋五星迂帝萬國謳唐天網恢疎王師
節制威惟連戮老生摧斃山祇引軍河龍渡帝渭倉散
積離宮弛閉闕輔來蘇遠方咸惠長安宮室上法太微
隋遷寶鼎唐在璿璣仗入雙闕詔出九圍三靈協載百
祿同歸帝謂太宗表正封略濤蕩飈掃霆馳電爍劒不
摧鋒弩無再曠西平沂隴東取河洛杲密德充頭懸面
縛北走獯鬻南達蠻荆遼碣作人梁岐底平風動神行

海隅蒼生莫不來庭於昭義堂誓衆資始天命所起于
胥頌美維予小子夙夜敬止於戲皇王緒思不忘

開元正厯握乾符頌

并序

張說

客有嘲臣曰聖主正新厯握乾符百僚賡歌以美時六
合鼓舞以頌德先生獨晏默書閣含翰詞林奚其為儻
儼也臣應之曰斗水不能評巨壑之量隙光未足議大
明之體何者見褊而守隘也握乾符者不謂執天命歟
執天命者非夫廣德休厯交相表裏況命者夫子之所

罕言也焉可偏贊而摠握符之盛哉如作者略大本舉
小節不亦仲尼之門所聽瑩也是以涸思乾慮久難其
述客無異焉客曰請終餘論粵若我大唐慶始白雲道
昇紫氣屬漢東失馭淮南不返高祖舉晉陽之甲戡定
闕西太宗因後后之師削平天下高宗收圖海外擒王
封中九域黎人重代飲澤雖鳴鸞改號神龍中興周鼎
歸唐玄圭祀夏中宗違代嬖孽窺國於是乎聖上起藩
邸入鈎陳一麾水心羣兇泥首崇復大聖越踐少陽受

禪當寧而光大前烈垂統拜壁而慎寧後嗣四海有覆
孟之安百代無委裘之隙是之謂聖人握符之大寶也
四星入輔五將出禦倚禮樂為國計仗仁義為軍勢英
賢集殿而文教成干戚舞階而武功振敬讓光于九族
孝慈行於萬宇積嶂西南渤海東北熾皮火毳暘炎山
污熱海向風來王黑貂駸駸浮天溟絕冰漠連歲獻款
鳥獸無猜人之意草木無不達之氣升中于天比天同
貴是之謂聖人握符之大政也歷試上黨黃龍飛天入

清中禁白虹指日瘞汾睢寶鼎見柴岱宗卿雲蔚非應
事而呈瑞者雖多狎而不紀矣是之謂聖人握符之大
祥也以數推氣以氣定朔以星殷時以閏成歲考星間
而革踈度置歲差而辨誤日立大衍之紀參大渾之晷
合鍾律之聲極鬼神之情是之謂聖人握符之大厯也
若夫仁聖根於內菁華發於外祥兆秘於前謠讖灼於
後自然之理也彼洛下閎者漢太初時一巧厯耳其云
後八百歲當差一日有聖人正之斯人也抑將露才揚

術預證來聖有耆舊之傳記無史策之明文然至隋之
開皇及麟德聖歷三家創法一引為徵約之年代則隣
近稽之圖籙則曖昧未有如新歷之昭昭者矣昔在唐
虞之際以斗精受命者七神得四均間氣而生者又二
十八人所謂三十五際者也禹以金德王故夏后之有
天下也生數四百年契以水德王故殷人之有天下也
成數六百年稷以木德王故周人之有天下也成數八
百年伯益之命中天而堯族以火德乘之故漢室之有

天下也生數再及二百年其間距王而興不能復大禹九州之跡及勝殘百年之命者皆五神之餘氣也皋繇降德皇唐復興土精應王厚德載物生數五百成數千年命歷有歸此其大較修德增祚與天無窮轉筭之徒莫能究也緯以入元三百四歲為德運七百六十歲為代軌千五百二十歲為天地出符四千五百六十歲為七精返初天人相應合若符節自堯典命羲和修重黎之舊理顓頊之歷上元甲子千五百餘歲得孔聖而春

秋之歷序暨開元十二年甲子凡三千四十歲遇聖上
而大衍之歷興是時也土德入生數之元天命當出符
之會信矣伏惟聖上聰明文思道德之具也豁達大度
皇帝之體也藝摠六經漢光之學也文通三變魏祖之
才也緣情定制五禮之本也洞音度曲六樂之宗也神
於弧矢黃軒之威也聖於翰墨蒼頡之妙也兄弟善友
王季之心也子孫衆多周文之福也大寶以定天位大
政以布廣德大祥以合靈符大歷以啓成命德位兼才

臨照如此符命介福粲彰如彼所謂廣德休歷交相表裏之效也善歷者必推來運以自神興王者不俟往言以表聖設徵夫浴下閎之語也其不有容成之事乎且如恃有命比於日孰是夏王之福也賴卜年衰其德豈謂周公之訓也故曰王者執天命在於俟天符致天符在於順天德布天德在於保天位四者備矣然後陳其盛德告於神明捨此道也胡可語正天歷握乾符哉謏臣懵學謝生玄造樂虞典之歌舜美周詩之美文敢不

敷信辭薦清樂獻上客之課託衆篇之後云爾

維皇六葉於赫啓聖步玉斗握金鏡地維續天柱正山
川授方雷雨施令清廟九祐堯門百慶郊稷尊祖擇昌
定命德自我流藝從我脩龜易八卦龍書九疇文含玉
律字吐銀鈎鳴絲鶴舞調箭獲愁集賢榜殿花萼名樓
神用外表事行先兆萬目朝徹千心暗曉卿雲爛熳黃
龍窈窕遊姑射神人宵登太山天下小飛祥定瑞均露
躋類鞮譯窮天琛維盡地燦此金戟鑄為農器匪直也

然探玄索秘軸止輪運辰居星轉得一神凝吹萬情辨
發歛潛合晦明幽闡階冀朝開宮槐夜卷正我長厯同
符大衍天地清焉日月貞焉四時行焉萬物生焉窮神
知化美功成焉金版玉牒遠頌聲焉

上黨舊宮述聖頌

并序

維開元十有一祀正月皇帝展義于河東挾右太行留
宴上黨整兵耀武入于太原設都建頌以崇王業南轅
汾睢祈穀后土天清日朗神歆如答三月庚午飲至長

安六軍解嚴四方和會邇觀法象遐詠德澤大虞巡之
典脩美漢祠之禮舉人心翕而一變神物效而無方於
是邠王臣守禮寧王臣憲申王臣撫岐王臣範薛王臣
業獻書於內開府儀同三司臣璟尚書臣駿臣象先臣
頴御史大夫臣灌抗疏於外僉曰陛下受天厯數稽聖
典謨道貫三靈仁育萬類掃陰沴而覩日開闢之功也
尊文考而御天帝王之孝也天以陛下為子人奉陛下
為君萬殊之福斯應畢臻三代之風頌聲咸作今潞人

懷代卽詠泗亭採聖崖延立石將表潛龍之館勒啓聖之圖勤亦至矣陛下推而不報其何以下塞衆望上對神休哉臣聞天之所啓人之忻戴必憑睿聖玄懿之德元命真符之紀功業見乎變德施加乎時德厚者施溥功玄者應速或階晦以彰或由難而昌蓋生其德之謂天授其時之謂命天有成命其可沒乎陛下昔居是州也紫雲在天神光照室白鹿來擾黃龍上昇隴出仙洞而神魚躍山開禪穴而靈鍾韻謠言合讖巨迹引途嘉

李傍連祥著自起當此時也金石預變獄訟先歸政殷
六府人重五教陶無窳器漁有讓泉神而化之人不知
力昔龍負圖而大舜登狼銜鉤而后殷昌玄珪錫於夏
禹赤伏歸於漢光應運協符希代稱寶未有窮祥極瑞
俶儻瓌異如今之至者矣若玄貺集而不彰則神心不
悅鴻業成而不贊則祝告無聞是掩天休而蓋聖德也
臣子之罪將何解焉願聽潞人以揚丕烈帝曰往者中
宗違代國步微艱天祚我唐大命集于睿宗大聖真皇

帝朕畏天將命不敢怠遑其乾符坤珍皆先聖之餘福
朕何力之有焉然重違昆弟公卿之請抑以敬從無為
虛美重朕不德也羣臣遊聖蕩莫能名約乎舊史敢頌
成績辭曰

帝德廣運乃聖乃神天祚聖兮唐惟舊邦其命維新再
受命兮帝初正人降居上黨天下往兮黃龍晝見攀天
而上九五象兮帝適于野紫雲之下求必在兮帝寢于
堂變龍有光觀者駭兮天迹童謠木連著立摠神異兮

空鍾化穴縞鹿赤魚何詭異兮上天無聲託類附形覺
悟人兮聖皇齋采在得戒失昭事神兮皤皤潞老樂我
王道愛舊宮兮赫赫頌功與天比崇攄無窮兮

龍池聖德頌

并序

張九齡

臣聞昔者玄德升聞皇天眷命元聖有作上帝何言而
必見意於休徵不忘象於幽贊惟茲降鑒若曰專精道周
萬物者其魄尤功濟生人者其祥大粵若古始肇有君
臣巢燧之前寂寥無紀書契之後炳煥可觀若乃鬼神

睢盱品彙紛錯性命未正吉凶不定而太昊氏將通其德則河為之出圖人食未粒鳥獸是如時不耕稼器無耒耜而神農氏將教其本則天為之雨粟蚩尤不道炎帝不制銅鐵鑄兵豺狼橫厲而軒轅氏將禁其暴則天為之降玄女洪水方割下民昏墊堯德莫能弭厥災舜功不能除其害而夏后氏將理其績則洛為之出書自茲已降蓋三千歲矣其間木火更王雲物告符有若狼銜鈎魚躍舟素靈出黃星見豈不以湯德有慙武善未盡

漢道既雜魏方亦偏唯以一至之應且為興王之兆則
未有天錫真符聖受休命遠與大禹相續超與上皇比
宗如我國家之盛者焉惟龍池蓋天之所以祚聖即今
上卜居之舊真京師塋壇之地傍無寶澤中忽濫泉非
常而靈液涓流無幾而神化寢廣榮光休氣若煙若雲
所未曾有則此之出雖清可以鑑而深不見底鱗介瑰
詭充滿其中時莫知其所然日徒見其有異中宗採識
者之議歷王氣而來遊聖上處或躍之時出飛龍而合

應臨淄始封也卽第在馬上黨歷試也靈符紹至天其以是永命我唐國家丁寧有所底止其若茲也夫成數有時而否至理無代而亡固在乎大聖之生乘運而作鼓天下之動安天下之危故獎順成功自古之啓祐之也如彼克定多難自天之叶贊之也如此初中宗違代后黨窺隙大盜狃於得志羣慝起而擅朝若綴旒旒然當此時也天與若不取鬼謀若不協則我祖宗之業無乃將墜而億兆之命亦猶倒懸聖上感之提劍而起

雷霆一奮妖沴以清內難既衰外虞有謚推戴太上照臨萬邦實天之為與人更始系皇統維乾綱決綻補壞蕩瑕滌穢而乃闕典咸備舊章悉舉處窮盡達在困必通品物資以再生寰區為之一變然後反華偽於朴還澆醜於醇以大道為源以至仁為根動推是心以御於事人見德而興行神享誠而介福故不任於刑罰亦不在於禱請大造化成玄猷充塞有如陽春播澤觸類皆滋泰山起雲無遠不徧雖昆蟲草木與蠻貊要荒樂其

所生安其所習在牛羊而勿踐有干戈而載戢又況於
衣冠華夏禮樂邦家而不形於斯須不彰於漸漬者也
夫然何教非德何化非經何能事之不舉何醇精之未
極周溥洋溢成乎緝熙至於太和莫不允若體包天地
之大事出皇王之表豈擎跽曲拳盡禮極力將用彥聖
不啻其口所能稱誦於吾君所可殆庶於至德且往者
之有開也天感精以降聖聖敬命以奉天此誠有元則
欽明文思及茲報本必嚴祗齋栗靈虔以屬之神化以

答之與初相明其微乃著紛綸先兆非篤信歟由是言之統天者人合符者聖而美德序命殊尤卓絕豈多乎哉至于古之興王必有所感五帝更尚五運傍通土者黃中之精於金為母水者善利之物於土為妃苟應期而有來必合德而為表是則然矣天其或者亦阜育羣化發揮蕃祉始告以聖有明徵終成乎帝之神冊因其立象之本會以相乘之數則載祀六百歷紀千年變而通之胡可量也宗子宗正卿褒信郡王璩若干人伯父

伯兄仲叔季弟聚族相與詣闕上言天意昭著固已久矣人事符合亦云至矣而一德是建太階既平靈臺靈沼赫赫明明天之為大雖莫能名王之在鎬豈無頌聲上初克讓抑而未許至於累請乃曰俞哉史臣不敏敢獻頌曰

茫茫元昊載凝載薄在帝庖羲繼天而作浩浩洪水包山襄陵舜亦命禹夏氏以興龍圖龜書二主是膺湯武已下夫何足徵

右元命

於鑠巨唐秉運而起續禹之統系

堯之紀五聖在天丕命曾孫高視河洛同符混元亦有

黃龍出於靈沼明明穆穆天子之表

右聖德

倬彼東井昭

章于天沈精降液下為靈泉泉靈有泚其深無底沈之

洋洋其甘如醴清德之鑑柔道之體洪源濬規實天所

啓

右靈泉

濯濯靈泉洞冥皇祇滋液流行化為神池曰止曰行

惟聖之作匪鱣匪鮪惟龍之躍植物斯生動物斯樂天根有

見曾是不涸

右神池

靈有休氣紛紛郁郁如山之苞如雲

之族潛龍在下瞻烏在屋兆云其吉周爰咨詢既契我

龜又叶我人鎬雖舊京其命維新

右休氣

蜿蜿黃龍神池

自出靈化惚恍噴雲沃日告帝之符其儀孔佶或潛于
泉或見在田與時順動亦應于天克配我皇無得稱焉

靈武受命宮頌

并序

楊炎

臣聞享天降命惟德也戡難奉時惟聖也必有非常之
運是興撥亂之功君以蒼生為憂不以濡足為患以寧
濟為業不以脩身為道此陶唐所以捨而不畏舜禹所
以受而不疑靈武宮皇帝躍龍之所日者奸臣竊命四

海蕩波我聖皇天帝探命歷之數啓龍圖作受命之書
付于我皇帝皇帝方遊崆峒以求至道於是羣公卿士
負玉旒金璽望氣於芒碭之野三進於閭闔之中曰臣聞
在昔蚩尤連禍大盜中國神農氏兵莫能勝天降玄女
勅軒轅氏大定其災厥後堯有九州之害而命禹禹以
四海之功而受舜陛下主毫大位十有九年精爽者皆
美德馨乾坤也必聞幽贊玄德上達景福有歸六聖覩
命歷之期兆人有臨難之請陛下畏災運而不處棄黎

元而不顧以至仁為薄以大寶為輕臣等若不克所請
與億兆之衆將被髮拊膺號於天而訴於帝矣皇帝唯
然改容曰豈人心歟丁卯廣平王倣太尉光弼司徒子
儀尚書左僕射冕兵部尚書輔國與北軍將士西土耆老
萬五千人排闥以訴帝曰今豺狼穴居宮闕陛下兆庶
為餌宗廟為墟若臣等誠懇未通是高祖不歆於太廟
且陛下涉渭則洪流涸迴鑾則慶雲見布澤而川池廣
勤道而嘉禾生靈祇髣髴玄貺幽感臣聞符命待聖而

作天運否終而會歲筴肝蠶會也睿武英明聖也臣等
敢昧死上聞帝乃灑齋宮啓金匱嗚咽拜受詔有司大
赦天下改元曰至德元年尊聖父為文武太皇帝是日
烟雲變作士庶踴躍黃龍見於東郊紫氣滿於天門翌
日也數百里衣裳會兼旬也數千里朝貢會踰月也天
下兵車會浹時也四方戎狄會以一旅成百萬之師率
胡夷平社稷之難禮郊祀戴聖皇與人合誠心以氣消
天癘動罔不吉歆無不報是以白鹿擾於王庭靈芝產

於延英化動而功成淵默而頌聲言禪代者陋蒼梧易
姓之名語嗣守者羞唐堯積善之辱述戡定者歎四紀
而復夏美中興者蚩三六而滅新於戲神祇之所歸往
品物之所法象鼓飛龍於尺水仗大義而東向矢謨發
號實在茲都願篆石宮庭以垂萬古俾過山澤知風雨
之奧窮造化識天地之鑪臣炎稽首敢獻頌曰

赫赫河圖啓天之祐雲從億萬皇在九五惟昔陶唐克
傳舜禹護也武也夫何足數彼妖者勃惟暴惟貪天實

即命人將不堪皇曰內禪于再于三盡武之善去湯之
慙兵車百萬洶洶雷震橫會九州為行為陣恃力者踣
從命者順孝以奉天神而撫運至德唐堯崇功大禹皤
皤北叟垂白而覩沛邑空歌周原已古徘徊頌聲永介
茲土

唐文粹卷十九上

欽定四庫全書薈要卷一萬九千八百三十七

集部

唐文粹卷十九下

宋姚鉉編

頌乙 摠三首

封禪

紀泰山銘

附

玄宗御製

大唐封禪頌

張說

大唐封東嶽朝覲壇頌

蘇頌

紀泰山銘

附

玄宗御製

朕宅帝位十有四載顧惟不德愾於至道任夫難任安
夫難安茲朕未知獲戾於上下心之浩蕩若涉於大川
賴上帝垂休先后儲慶宰衡庶尹交修皇極四海會同
五典敷暢歲云再熟人用大和百辟僉謀唱予封禪謂
孝莫大於嚴父謂禮莫尊於告天天符既至人望其積
固請不已固辭不獲予與夫二三臣稽虞典繹漢制張
皇六師震疊九寓旌旅有烈士馬無譁肅肅邕邕翼翼
溶溶以至於岱宗頂也爾雅云泰山為東岳周官曰充

州之鎮山實惟天帝之孫羣靈之府其方處萬物之始
故稱岱焉其位居五岳之伯故稱宗焉曰昔者受命易
姓於是乎啓天地薦成功序圖錄紀氏號朕承先王茲
率厥典實欲報玄天之眷命為蒼生之祈福豈敢高視
萬古自比九皇哉故設壇場於山下受羣方之助祭躬
封燎於山上奠一獻之通神斯亦因高崇天就廣增地
之義也乃仲冬庚寅有事東岳類于昊天上帝配我高
祖在天之神罔不畢降粵翌日禪於社首侑我聖考祀

於皇祇在地之神罔不咸舉暨壬辰覲羣后上公進曰
天子膺天符納介福羣臣拜手稽首稱千萬歲慶答歡
同陳誠以德大渾叶度彛倫攸叙三事百揆時乃之功
萬物由庾兆人允植列牧衆宰時乃之功一二兄弟篤
以孝友錫類萬國時惟休哉我儒制禮我史作樂天地
擾順時惟休哉蠻夷戎狄重譯來貢累聖之化朕何慕
焉五靈百寶日來月集會昌之運朕何感焉凡今而後
儆乃在位一王度齊衆法握舊章補缺政存簡易去煩

苛思立人極乃見天則於戲天生蒸人惟后時又能以
美利利天下事天明矣坤厚載物惟后時相能以厚生
生萬人事地察矣天地明察鬼神著矣惟我藝祖文考
精爽在天其曰懿予幼孫克享上帝時若馨香其丕乃
曰會我之文武曾孫其誕錫新命續我舊業永保天祿
子孫其承之予小子敢對揚上帝之休命則亦與百執
事尚綏兆人將多于前功而罔彼後患一夫不獲萬方
其罪予一心有終上天其知我朕惟實行三德曰慈儉

謙慈者覆無疆之言儉者宗將來之訓自滿者人損自
謙者天益苟如是則軌迹易循基構易守磨石壁刻金
記後之人聽詞而見心觀末而知本銘曰

惟天生人立君以理惟君受命奉為天子代去不留人
來無已德涼者滅道高斯起赫赫高祖明明太宗爰草
隋政奄有萬邦罄天張宇盡地開封武稱有截文表時
邕高宗稽古德施周溥茫茫九夷削平一鼓禮備封禪
功齊舜禹巖巖岱宗衍我玄神中宗紹運舊邦惟新睿

宗繼明天下歸仁恭已南面綢繆化醇告成之禮留諸
後人緬予小子重基五聖匪功伐高匪德矜盛欽若祀
典丕承永命至誠動天福我萬姓古封泰山七十二君
或禪社首或禪云云其迹不見其名可聞祇遙文祖光
照舊勲方士虛誕儒書齷齪佚后求仙誣神檢玉秦災
風雨漢汙編錄德未合天或承之辱道在觀政名非從
欲銘心絕巖播告羣岳

大唐封禪頌

張說

皇唐六葉開元神武皇帝再受命致太平乃封岱宗禪
社首鑿石紀號天文煥發儒臣志美立碣祠壇曰厥初
生人俶有君臣其道茫昧其風朴略因時而歆起與運
而紛落泯泯沒沒無聞焉爾後代聖人取法象立名位
衣裳以等之甲兵以怛之於是禮樂出而書記存矣反
其源致敬乎天地報其本致美乎鬼神則封禪者帝王
受天命告成功之為也閱曩聖之典訓考列辟之通術
疇若天而不成曷背道而靡失由此推之封禪之義有

三帝王之略有七七者何傳不云道德仁義禮智信乎
順之稱聖哲逆之號狂悖三者一位當五行圖籙之序
二時會四海昇平之運三德具欽明文思之美是謂與
天合符名不死矣有一不足而云封禪人且未許其如
天何言舊史者君莫道於陶唐禹舜臣莫德於皋陶稷
高三臣降德皆有天下仲尼叙帝王之書繫魯秦之誓
明魯祀周公用王禮秦承伯益接周統孔聖微旨不其
效歟然秦定天下之功高享天祿之日淺天而未忘庭

堅之德也故大命復集于皇家天之贊唐不惟舊矣其興之也玄靈啓迪黃祗顧懷應歸運以義舉撫來蘇以利見護也無放夏之慙武也無伐殷之戰高祖創業四宗重光德有格天漏泉蒸雲濡露菌蠢滋育氤氲涵煦若天地之覆載日月之照臨溥有形而歸景罄無外而宅心百有八年于茲矣皇帝攘內難而啓新命戴睿宗而續舊服宇宙更闢朝廷始位蓋義軒氏之造皇圖也九族敦序百姓昭明萬邦咸和黎人於變立土圭以步

歷革銅渾以正天蓋唐虞氏之張帝道也天地四時六
官著禮井田三壤五圻成賦廣九廟以尊祖定六律以
和神蓋三代之設王制也武緯之文經之聖謩之神化
之然猶戰戰兢兢日慎一日納規誨以進德遂忠良以
代工講習乎無為之書討論乎集賢之殿寵勇爵貴經
明翼乎鸛鷺之列在庭毅乎貔豹之師居鄙人和旁感
神寶沓至乾符坤珍千品萬類超圖溢牒未始聞記我
后以人瑞為心不以物瑞為意王公卿士儼然進曰休

哉陛下孝至于天政合乎道前年祈后土人獲大穰間
歲祀圓丘日不奄朔感祥以祚聖因事以觀天天人交
合其則不遠意者喬丘埽路望翠華之來上帝儲恩俟
蒼壁之禮久矣焉可專讓而廢舊勛羣臣固言勤帝知
罪至于再至于三帝乃揖之曰欽崇天道俯率嘉話恐
德不類敢憚于勤其撰巡狩之儀求封禪之故既而禮
官不戒而備軍政不謀而輯天姥練日雨師灑道六甲
按隊八陣警蹕益冬仲旬乘輿乃出千旗雲引萬戟林

行霍護燐爛飛焰揚精原野為之震動草木為之風生歷
郡縣省謠俗問耆年舉百祀興墜典葺闕政攸徂之人
室家相慶萬方縱觀千里如堵城邑連歡丘陵聚舞其
中垂白之老樂過以泣不圖蒿里之魂復見乾封之事
堯雲往舜日還神華靈鬱爛漫乎穹壤之間是月來至
于岱祇祓齋宮滌濯靜室凝神立覽將款太一議夫泰
山者聖帝受天官之宮天孫摠人靈之府自昔立國莫
知萬數克升中而建號惟七十而有五我高宗六之而

今七矣非夫尊位盛時明德曠代遼闊難并之甚哉先
時將臻夫大封也累封疆於高岡築泰壇於陽趾夫其
天壇三襲辰陞十二咸秩衆靈列坐有次崇牙樹羽管
磬鏞鼓宮懸於重墮之內千戚釵及鈎戟殲戮周位於
四門之外伐國重器傳代絕瑞旅之於中庭玉輦金轂
翠冒黃屋夾之於端路庶官百辟羗夷蠻貊褒成之後
讓王之客序立於禮神之場髦頭駑牙鐵馬金鏃介冑
如雪旗幟如火遠市於清禁之野於是乎以天正上元

法駕徐進屯千乘於平路留羣臣於谷口皇帝御六龍
陟萬仞獨與一二元老執事之人出天門臨日觀次沆
瀣宿曉巖赤霄可接白雲在下庚寅祀高祖於上封以
配上帝命衆官於下位以享衆神皇帝冕裘登壇奠獻
俯僂叶金奏佾羽舞撞黃鐘歌大呂開閭闔與天語清
將信公奉斗布度樞建皇極勤恤蒼生昭嘏乎未兆禳
災乎未萌上下傳節而禮成樂遍福壽同歸而帝賜神
策乃檢玉牒於中頂揚柴燎於高天庶忠誠之上達若

憑焰而駕煙日轡方旋神心餘眷五色雲起拂馬以隨
人萬歲山呼從天而至地越翌日尊睿宗侑地祇而禮
社首遂張大樂覲東后國風惟舊無黜幽削爵之誅王
澤惟新有眚災大賚之慶不浹日至化洽於人心不崇
朝景福遍於天下然後藏金匱於祔室迴玉鸞於上都
煌煌乎真聖朝之能事而高代之盛節者也于斯之時
華戎殊俗異音同歎曰岳合多雨山峻多雲宜有大舉
百萬之師剋期千里之外及行事之日則天無點翳地

無纖塵嚴冬變為韶景寒風鬱為和氣非至德其孰能
動天如此其順者乎昔人云自東自西自南自北無思
不服今信知聖人作而萬物覩其心服之之謂矣或曰
祭泰折主先后非禮歟曰是禮也非宜也王者父事天
母事地侑神崇孝無嫌可也且夫柴瘞外事帝王主之
蒸嘗內事后妃助之是開元正人倫革弊禮起百王之
法也故令千載賤末光聆絕韻咀甘實漱芳潤爍玄妙
之至精流不已之淑聲臣說作頌告于神明四皇墳而

六帝典雖吉甫亦莫能名徒採彼輿人之詩曰大矣哉
維天為大惟皇則之率我萬國受天之祺子孫百代人
神共保綏之云爾而已矣

大唐封東嶽朝覲壇頌

并序

蘇頌

封祀之山五在中國泰嶽首之昊穹之命再集巨唐皇
帝受之臨位十四年考虞氏歲巡之義諷周王時邁之
什十月辛酉步自有洛十一月壬戌帳殿齋於岳趾淵
默以清繹思而照將紀功布度順斗承天精享也已丑

宏觀軼區宇盛儀振開闢高臨建鳳萬隊張皇以燭山
上御飛龍百神翕習以扶道國台二藩后四髦士密侍
信臣高位扈封臺列升降不下五十以聖言冲邈瑤牒
寶書誓之旨曰朕獲守丕業恐不克駿命惟上帝儲休
錫蒼生無疆之慶朕之慶也古則秘之何哉屬寒馳迅
飈露清終夕若掃若鋤晏然而已庚寅天官次錄王制
協時嚴高祖以配之嗣高宗以陟之冕裘立珪璧序潔
壘俎調鍾呂倨勾於簏簾戛擊手祝敬寶駢瑞兮物焜

煌空薄霄兮音容與則纖塵不動和氣充塞日在於觀
天為之門揚日大光謂小天下昭以抱戴見之卿霽郁
郁紛紛喜氣烟煴當芝檢引柴熏太紫洞而三辰接鬱
蒼搖而萬歲聞自下達上俟吾君君之來兮望如雲端
兮睟聖之門至尊辛卯有事于社首以泰折如泰壇於
穆我睿宗侑而作主奠獻嗚咽天子之孝也金匱
歸勛於祖禰石礪藏美於乾坤戒咸秩則司存癸巳載
大旗合大樂三陔嶠以惟抗四亞鏘而輅止朝羣牧揆

千官底邦賦數庭實華蟲辨等車馬來覲周人隋人二
王之賓戎狄蠻貊萬里重譯必拱于著執贄奉璋顙顙
昂昂靡敢怠遑乃建雞竿伐鼉鼓帝命出皇恩溥揚翼
風作解雨施舍之蕩滌之宥法罪除頗顙湧洋溢周
流黜霸不崇朝而遍者與此山俱疇翳而不拔胡微而
不鋪也亦既稱壽申命宗伯咨爾頌焉效古之刻石臣
頽稽首再拜而言曰臣聞昔在帝堯臣惟咎繇聰明之
謂聖邁種之謂德天若曰依于巨唐易姓者李王於中

華崇功者唐聖之澤德之浸也我唐祚之興昌符誕膺
兩儀動六葉承皇帝宣高祖四宗之景烈肇開元神武
之明號廣矣大矣莫有不寧罔有不俾咸一德之輔不
二心之臣羣后抗詞曰臣聞先王因天事天因地事地
因名山升中于天陛下得天之經得地之義得人之行
行也者孝莫大焉兼三才以為政政也者仁莫大焉含
萬物以為性今三才貞萬物亨六典平九功成官不濫
獄不放至于刑清良有以也因斯而談清明在躬志氣

如神之睿者君也四國于藩四方于宣之美者臣也有
物有則我君臣保乂之原所由於前設其教於後爾往
歲邦危中否天討內難陛下提三尺之劍扛閭闔絕勾
陳趨北軍正北辰然後翼翼乾乾尊尊親親立我蒸人
聖考所以付天下之公器蹈汾陽之清塵唐雖舊邦其
命惟新古者振兵釋旅祠土祈穀先事也我是以幸太
原祭汾睢耀金甲肅邊鄙虜馬龍言而不敢南向解嚴京
師獲寶鼎獻宗廟戍人歸而盡務東作報福京坻於是

乎爰佐五時郊天以奉時爰崇九室祫祖而敬思昭格
遲遲神人允釐無何籍三脊盛六穗不召斯至擁休之
類如山則委曷月而秘豈非享物降嘉司火也立渾同
度在璿也陛下姑謂之薄臣所未諭且管氏訖齊帝王
凡八十九湮淪鬱沒孰若致美我高宗勒岱甲子正六
十旰餐歲蕤故能應期我神武惟繼代奉業增高保鴻
缺乎中何也即先后以權蹇阻于運二宗紹復未遑厥
功神閭之契不在諸子而當聖躬固不可辭者審矣帝

曰俞畏德之不稱而左輔右弼雜搢紳鴻碩之倫抱藹
懷書蒸雲吐霧方集賢內殿講議前席以論之傳不云
乎君子勤禮敬之至也易不云乎先王作樂豫以動也
慎矣哉禮樂之為用故執禮者具刪弊則質宜之自我
變樂者理去商何害謙以為臣二者洽而三讓之制曰
可始嚴鹵簿騰七萃啓禁闕迴九重以聽乎鸞聲之雍
雍匪疾匪徐物有其容動植讚華夷觀駢闐總擗羨漫
半散出成皋踰滎波馮滑臺眺洪河遂並昆吾之墟倘

佯乎大舜之澤瀕四瀆二濟入于充徑九壺三齊喬於
岱推二旬有六而頓行在莫不皤皤華皓如藿傾陽或
牽以餽或捧之觴偃僂乎康莊一以伸神武之今日一
以感乾封之舊章迺餽歸之觴舉之慈且惠而與之驩
沸渭頡頏矧國鄒魯家洙泗乘汶野而圖記可知指泮
林而頌聲不墜以周公之故將孔子之後翹然希王者
之屬車聖人之清蹕則久及信宿之應巖巖所瞻宗神
曰天齊王加一等於三事戶二十供王祀環十里禁人

樵報也大禋旅之數重褒成之祿撫遺眚賜之復帝曰
吁夫艱難繫王業休咎牽人事况天監之殊祥也殊典
也不自滿而虔鞏于位朕寶臣曰乾曜洎說有初有終
時乃風欽哉汝作朕左右丞相繫汝忠益以嘉猷補袞之
闕罔或怠遂弘天封煥天章篆介丘而旋德陽大饗乎
羣方程後代美其律聲其實墳作四而籍言七也臣頌
不敏繼伯夷之直清微太史之留滯聆金奏同百獸之
舞振木鐸採萬人之詩敢陳詩以頌曰

天子聖兮天孫崇登以封兮報以功受命再惟皇代天
之賚人所載士馬山嶸戈矛山沓禎符山雜靈響山荅
天與人合我鋪衍兮長粹清太元冊兮太一精休光光
我之慶成舜四朝而禹萬國莫之我京

唐文粹卷十九下

欽定四庫全書薈要卷一萬九千八百三十八集部

唐文粹卷二十

宋姚鉉編

頌丙

雅附摠八首

神武四

大唐中興頌

元結

鳳翔出師紀聖功頌

楊炎

大唐河西平胡聖德頌

平淮西雅

附

柳宗元

唐文粹

時政一

聖政紀頌來鵠

豐年一

德勝公頌歐陽詹

祥應一

歲星居心頌權德輿

高世一

伯夷頌韓愈

大唐中興頌

并序

元結

天寶十四載安祿山陷洛陽明年陷長安天子幸蜀太
子即位於靈武明年皇帝移軍鳳翔其年復兩京上皇
還京師於戲前代帝王有盛德大業者必見于歌頌若
令歌頌大業刻之金石非老於文學其誰宜為頌曰
噫嘻前朝孽臣姦驕為昏為妖邊將騁兵毒亂國經羣
生失寧大駕南巡百僚竄身奉賊稱臣天將昌唐繫睨
我皇匹馬北方獨立一呼千麾萬旗戎卒前驅我師其

東儲皇撫戎蕩攘羣兇復服指期曾不踰時有國無之事有至難宗廟再安二聖重歡地闢天開蠲除妖災瑞慶大來兇徒逆傳涵濡天休死生堪羞功勞位尊忠烈名存澤流子孫盛德之興山高日昇萬福是膺能令大君聲容沄沄不在斯文湘江東西中直浯溪石崖天齊可磨可鐫刊此頌焉何千萬年

鳳翔出師紀聖功頌

楊炎

舜有兩階之舞周有孟津之會皇帝有岐陽之蒐德莫

勤乎安國勛莫配乎立極利萬物莫近乎去暴蓋受天
元符與人請命冥契相合億兆有歸以唱則感神鬼之
心以征則去雲雷之難維唐七葉姦臣大盜於二京皇
帝龍鳴於河北觀兵雍上建都發號以朝萬國心嚮天
地志通幽昧淳精四達大造玄成於是巢山駕海之羣
狼麤鳥章之君不期而趨於闕下者四十有三萬元帥
廣平王俶太尉光弼司徒子儀等稽首言曰臣聞天啓
聖以俟時聖感時而赴難非神功不能當大運非玄德

不能合人心故軒轅之道也伏蚩尤宗周之仁也稱襁
負陛下之德大瑞於人和人和而動天天與和合氣百
姓因之以獨化四夷因之以子來王師德之以貞勝意
者河洛僂怨後東征之期人靈駿奔望西狩之禮天子
方齊寶輅講金匱之書翌日霓旌武賁大車之輪黃鉞
靈囂彤弓太阿荆韓楚魏之廣七閩五獠之長金鼓百
萬車徒九合大陣于東郊皇帝建白麾以誓于軍曰維
高祖歆于上天四宗重光照臨下土百有五十祀至于

聖皇摠武之干戈備文之法象最爾逆虜敢迷天紀盜
我符璽黷我威靈使四海之內兵革縱橫肝腦塗裂旻
蒼降鑒錫命於予俾續夏已墜之功寬堯未刑之族於
戲余匪玉帛山河是愛惟蒼生災害是憂匪天命威力
是憑惟人心忠義是保咨爾張目成天羅植髮成干櫓
布和成將帥厲氣成風雲若作進退爾惟旗鼓若斷首
尾爾惟常蛇若戮鯨鯢爾惟干將若拯沈溺爾惟巨艦
夏有一旅之衆武有十人之暮志定金石信非盟誓爾

其念哉是時天威動六合兵氣連太白乾坤為之坼北
河嶽為之震蕩彼狐鳴鑿齒之徒不崇朝而聲反於謳
歌形歸於蹈舞者幾過半矣故鄆杜之師以形勝灞上
之充以威逐桃林之陣以奇破河洛之孽以氣推帝乃
開天牢迴豹尾陵顓氣鎖欃槍應龍秉鉞玄女侍坐乃
考夏氏配天之義備漢皇建武之典雲髦玉輅山動地
踊降自西雍幸于京師萬姓前導百靈為衛布德澤望
陵寢悲黍稷之將秀覽城闕之為墟以雷雨洗川澤以

皇風清怨怒以大賞議勤勞以成功告宗廟以詳明去
聾昧以惠政哀困窮清蹕而奉聖皇稱觴以朝前殿於
是東國耆老長安士庶排御輅入天庭動千門呼萬歲
煙雲下遶林藪山迴神靈頌於堂精魄感於廟王侯慶
於國父子洽於家鍾石反於懸壘俎陳於席華戎踴躍
喜氣磅礴日非三舍天聲萬里神謀不得窺其奧天道
不能後其時斯一會之略也然後動變化為鑪假仁義
為途陶氣象鑿耳目與神合司契以道浸澆醜全屏象

之形斷珠王之脛然後以景星燭夜甘露清氣昇閭風
對天姥捨鴻名以還太素秉大厯而統人紀俾不思而
降不祭而歆以元和感生溥古於是宰臣聚而言曰主
上以神武清難至德遂人崇勛絕瑞光照萬古闢開日
月于今六年百姓豈忘力於帝乎人臣盍謝生於天乎
請相與鑿石於誓師之場告成於得衆之地斯王道之
盛典臣炎稽首敢獻頌曰

天命帝兮蕩妖昏交風雨兮會秦門惟聖德兮漫海外

五單于兮勇士會俗鳥獸兮家雲鳥越浮山兮泛青草徵
羽騎兮列天營啓金滕兮賜長纓日為車兮雷為鼓醢
鯨鮑兮掃煙雨開明堂兮饗文祖帝為皇兮后為母登
雲臺兮冊王府篆穹石兮駕終古

大唐河西平胡聖德頌

并序

維唐至德二年春正月武威郡胡洎九蕃夷落內伺師
旅之間外合狼豕之兇據金城害州伯蛇變交戟之下
炎焚大澤之中二月乙丑皇帝以五命之服詔太僕崔

傳摠中權專上將誓軍前之士卻城下之盟又命內常
侍劉日新振鼓鐸之音護羌戎之長林竦蝟合會于東
郊粵庚午高牙大旆鐵馬長鑣歆以清笳陣以雲蛇列
于四衝蓬頭執戟鼓以靈鼉進于逵路趨悍獷猱虎裘
猿臂北陵于土門之隊鉤車雲梯強弩堅楯齊傳于西
烽之亭於是引熊虎之師杖龍蛇之劍矛戟四起煙塵
火色金鼓一振天地徘徊血亂玄黃聲囂瓦屋是風雲
皆入陣彼草木盡為兵日月垂照於窮鄉皇靈赫臨於

天外名王貴馬大王文貝素女錦衣百金之產萬井之
資皆委于入貢之府布于有地之官是時也千人踊萬
人賀美太階之符見頌偃伯之議興特進金城太守李
萬頃洎五邑長吏軍正大夫等言曰蓋聞王命先天以
奉時賢臣合統以偕運靡乘乎帝錄不能撥亂罔應乎
間氣不得遭逢故大人之作必先靖難以摧兇取暴為
治國以任賢杖能為建功磅礴乎茅茨之下歲蕤乎玄
古之上斯軒轅得之以勝蚩尤大夏得之以勝有扈西

伯得之去殷伐崇太宗得之奄有遼海上皇得之克平
巨猾陛下得之再清宇宙掃蕩氛穢允若大唐之新命
復高祖之天下臣等恭惟六聖騰光百有五十祀周賁
海寓鋪敷菌蠢丹穴之賁孤竹之君金匱括羽委命下
吏陛下建大號績鴻業歸勛祖禰昭事聖皇是必天錫
忠良佐成命器二臣所應皇運之統伏崇羽之允太康
西人永永來裔願篆石誌美以為頌云

詔虎臣兮殪天狐載火旗兮耀昆吾霽塵壘兮被戎都

獻平淮西雅

并表

柳宗元

臣某言臣負罪竄伏違尚書牋表奏十有四年聖恩寬宥命守遐壤懷印曳紱有社有人

云云

伏惟睿聖文武

皇帝陛下天造神斷克清大慙金鼓一動萬方畢臣太平之功中興之德推校千古無所與讓臣伏自忖度有方剛之力不得備戎行致死命況今已無事思報國恩獨唯文章伏見周宣王時稱中興其道彰大于後罕及然徵於詩大小雅其選徒出狩則車攻吉日命官分土

則崧高韓奕蒸人南征北伐則六月采芑平淮夷則江漢常武鏗鉤炳耀盪人耳目故宣王之形容與其輔佐由今望之若神人然此無他以雅故也臣伏見陛下自即位已來平夏州夷劒南取江東定河北今又發自天衆克翦淮右而又大雅不作臣誠不佞然不勝憤踊伏以朝多文臣不敢盡專數事謹撰平淮夷雅二篇雖不及尹吉甫召穆公等庶施後代有以佐唐之光明謹昧死再拜以獻平淮夷雅二篇

皇武 方城

皇武命丞相度董師集大功也

皇者音其武于澌于淮既徒既車環蔡其來狡衆昏囂

甚毒于醒狂奔呌呌以干大刑皇咨于度惟汝一德曠

誅四祀其後汝克錫汝斧鉞其往視師師是蔡人以宥

以釐度拜稽首廟于元龜既類既禡于社是宜金節煌

煌錫鎬彫戈犀甲熊旗威命是荷度拜稽首出次于東

天子餞之罍斚是崇鼎臠俎載五獻百籩凡百御士班

以周旋既涉于澹乃翼乃前孰圖厥猷其佐多賢宛宛
周道于山于川遠揚邇昭陟降連連我旆我旗于道于
陌訓于羣帥拳勇來格公曰徐之無恃額額式和爾容
惟義之宅進次于郾彼昏卒狂哀允鞠頑鋒蝟斧蟾赤
予匍匐厥父是亢怒其萌芽以悖太陽王旅渾渾是佚
是怙既獲敵師若飢得舖蔡允伊窘悉起來聚右擣其
虛靡愆厥慮載闢載被丞相是臨弛其武刑諭我德心
其危既安有長如林曾是謹詭化為謳吟皇曰來歸汝

復相予爵之成國昨以夏墟度拜稽首天子聖神度拜
稽首皇祐下人淮夷既平震是朔南宜廟宜郊以告德
音歸牛休馬豐稼于野我武唯皇永保無疆

皇武十有一章章八句

方城命懃守也卒入蔡得其大醜以平淮右

方城臨臨王卒峙之匪徼匪競皇有正命皇命于懃往
舒余仁踣彼艱頑柔惠是馴懃拜即命于皇之訓既礪
既攻以後厥刃王卒疑疑熊羆是式衝勇韜力日思奮

強寇昏以狂敢臨愬疆士獲厥心大袒高驤長戟酋矛
粲其縷章右翦左屠聿禽其良其良既宥告以父母恩
柔于肌卒貢爾有維彼攸恃乃傾乃誘維彼攸宅乃發
乃守其是爰獲我功我多陰謀厥圖以究爾訛雨雪洋
洋大風來加于燠其寒于邇其遐汝陰之茫懸瓠之峨
是拔是震大殲厥家狡虜既縻輸于國都示之市人即
社行誅乃諭乃止蔡有厚喜完其室家仰父俯子汝水
沄沄既清而瀾蔡人行歌我步逶遲蔡人歌矣蔡風和

矣孰類蔡初胡甌爾居式慕以康為愿有餘是究是咨
皇德既舒皇曰咨懋裕乃父功昔我文祖惟西平是庸
內誨于家外刑于邦孰是蔡人而不率從蔡人率止惟
西平有子惟我有臣疇允大邦俾惠我人于廟告功以
顯萬方

方城十章章八句

聖政紀頌

并序

來鵠

穆宗皇帝臨大朝與羣臣言奏政事羣臣退而宰臣奏

曰陛下問及乎政事此三皇五帝之所徽美也陛下不問及史臣此三皇五帝之所弭已也徽美者將有乎聞也弭已者將有乎亡也以聞之而又亡之則陛下徒有宵衣旰食之名規天條地之績與羣臣言後若飈然拂冠過冕湮時銷日無得用於後譬如十夫樹楊一夫拔之無得以成其大也政事羣臣得陛下日問之是十夫樹楊也史官執筆為陛下日遠之是一夫拔楊也使後之人訝聖朝空晨虛夕閒殿曠廷無君臣咨謀洋溢之

言之社稷安危強讜之說是不亦遠史臣致不載其事
如拔去其楊將弭已之謂乎臣伏念貞觀永徽之代百
官之有耳目但聽視天子而已故言事者安論紆詞無
疑權慮勢史官執筆于階之下天子側旒于殿之上奏
者發誠于廷之中是以正衙一開則臣誠前而啓之帝
旒近而鎮之史筆隨而絡之由是君臣謀國圖政之事
俞機都要之言訖業發神豐編照物偕籍于堯典差光
于天陽至今見太宗文德若三皇五帝之所徽美也自

永徽之後宰執不正窺伺是忌針棘前後阻越對駁狼
噬虎飡持膏銜肉蓋以言多為已曾不致君內在失中
畏使人聽乃奏史官與百僚俱退然後宰臣請事由是
君有問而宰臣知之史官不得與於聞君有舉而宰臣
謀之史官不得記其事次第周行檢錄制誥與冗吏同
工而已臣嘗涕泣以歎豈有以一已之細一性之忌於
泰畧圭景之間苟嗜急須迴天遮上使聖緒神績有嘉
駁善諷罔得聞於千萬年枉有謂明朝空晨虛夕間殿

曠廷無君臣咨謀洋溢之言之社稷安危強謹之說若
今踵而承之則不唯臣有障聰蔽睿之刺抑陛下雖有
三皇五帝之所徵美而若遠史臣則三皇五帝之所弭
已也抑又有一夫拔楊之謂歟臣請史官執筆當羣臣
奏事隨日撰錄號為聖政紀臣立朝荷祿幸甚穆宗皇
帝動宸領旒憮然歎曰吁朕罔敢粉名厥後乃罔知厥
後然聖人存簡策者亦非以粉名也蓋存乎大國之典
鴻祖之業我國有典我祖有業業在于典典在于史曷

厥史不書是尸余于祖涸業于典也朕纘承聖緒恭惟
恪思將念厥政未嘗不離安廢酣馳荒驚遠是以每與
宰臣言如簇天下一巡省每見宰臣退而展天下盡聞
知豈圖臣蓄猾謀公無同事欲弄尾舌先衛巖穴隔斥
史臣占佞明后致懿搜嘉訪不存堯典之書善諷名猷
莫出清廟之什史臣負我不舉其官宰輔盡忠厥聞有
此由是詔史職執史筆立于廷之下錄君臣臚句之必
行載剛毅進退之敢議題其篇目曰聖政紀也至上之

即位三年有鄉校小臣來鵠居山澤間常私心重惜史臣以其史臣者是當國之鏡千億代之眉目也因窺穆宗實錄得解憤釋嫉於立史官為聖政紀者追而頌出其事以鑒今之廷列故拜獻其頌曰

三皇不書五帝不紀有聖有神風銷日已何教何師生來死止無典無法頑肩髀比三皇實作五帝實治成天造地不昏不圯言得非排文得聖齒表表如見者莫若乎史是知朴繩休結正簡斯若君誥臣箴觚編毫絡前

書後經規善鑒惡國之大章如何寢略嗚呼貞觀多吁
永徽多俞廷日發論殿日發謨牙孽不作烏鼠其除論
出不蓋謀行不紆楹然史臣蛇然史裾瞠瞠而視逶逶
而婁翹筆當面決防納污不桎爾智不席我愚執言直
注史文直敷故得粲粲朝典落落廷謇聖牘既多堯風
不淺頌編坦軸君出臣顯若儼見旒若俯見冕無間殿
曠廷無尸安素晏三皇不亡五帝不翦太宗得之史焉
斯展暨乎後相圖身天子專問我獨以言史不得近丘

明見嫌倚相在擯秉筆如今隨班不進班退史歸惘然
疇依奏問莫覩嘉謀固稀取彼誥命祿為國肥烱哉時
皇言必及章德室五帝道與三皇如何翊臣曉肉嗜益
甯距磨快福衡物長控集僚位占護陽光垣私藩已遠
史度唐俾德音嘉訪默縮暗亡咽典噤法蓋聖籠昌曷
以致此史文不張後必非笑將來否臧謂乎殿空宸逸
朝懜廷荒不知姦蔽文失汪洋有貞觀業有永徽綱亦
匿匪見亦寢匪彰賴有後臣知言不佞伊尹直心太甲

須聖事既可書史何不命乃具前欺大陳不敬曰逐史之喻請以物並且十夫樹楊一夫欲競裁既未牢擗豈能盛帝業以裁逐史似擗穆宗憮然若疚若營何昔臣斯隱我祖正不傳親問不寫密諍孰示來朝以光神政由是天呼震爰徵奔召急史提筆來叱廷而入端耳抗目不撓不挹擗旁側頭螭蚪擺臍握管絕怡當殿而立君也盡問臣也倒誠磊磊其事鏜鏜其聲大何不顯細何不明語未絕緒史已錄成錄成謂何書政紀名伊紀

清芬可昭典墳古師官鳥昔聖官雲方之我后錄里書
分錄有君法書有君文君法君文在聖政紀云殿無閒
時廷無曠日雲諏波訪倦編刊筆君劬臣勞上討下述
惟勤惟明在聖政紀出至德何比至教焉如孰窺孰則
外夷內儲謂君有道乎臣有謨歟有道有謨在聖政紀
書一體列秩同力翼戴祈福去枚絕防無礙國章可披
唐文可愛善咨不偷嘉論不蓋不偷不蓋在聖政紀載
諒夫揔斯不朽可懸魏闕愚得是言非訕非伐實謂鑒

臣渾沌開君日月妖物零死天文光發惟我之有頌兮
奚斯躍而董狐斃

德勝頌二章

并序

歐陽詹

唐貞元六年歲在庚午陰陽家流曰歲在午人馬食土
人之所食也穀馬之所食也草今言食土明歲無嘉穀
而野無青草則運數于茲合凶災之大者於是天尋舊
步地轉恒軸交糾迴薄將有結于常沴自春二月至于
夏五月或赫日杲杲或密雲溶溶為焦灼為霖霖似不

日而至皇帝宿布大和人神鳥獸魚鱉咸若騰歡心揚
喜雲欣欣熙熙休氣中積浹磅礴浮蒼蒼潛相戛磨力
強者勝九陽構旱而莫展六陰作潦而不就氛祲靄為
慶雲烈景皦為祥光油油薰薰宛復如春塊不破而雨
足條無聲而風暢日者生氣欲凝淑氣猶競彼雖罔得
為禍此亦未能為福徘徊相持時澤不降五稼含萌而
待藝百芳蓄穎以思圻至是土膏融甘液宣若決渟泉
如開涌煙豐本增岐芄芃繇繇無磽堦與良沃獲一十

於百千賸蔬雲蟲以委國餘糧嶽峙而栖畝夫體病不能害心心平必能制體古人曰人者天地之心也既和且平則天地之病又焉得成歟況奔走游泳之物曰靈曰祇之類皆吁歛怡逸於其中乎宜其僚乾元之宿瘵愈坤元之常疾以至於交泰如斯之盛邪古先帝王至聖則堯至仁則湯有黎毗以稱理歷水旱而莫禦豈不以道未全洽而德尚涼哉皇帝非徒能禦之又易之為大慶殊祥其於道德可謂充塞洋溢光今而邁古矣元

元鳴啞歌聖代者動天殷地以夜繼晝而其詞未弘輒
為頌二章用貽於康衢庶事明而聲暢流乎無窮而以
德勝目篇頌曰

歲在午天災于常昔人食土今我飫梁匪徒我飫梁鰥
寡千箱盛矣乎吾皇之德變青為祥休哉德兮
歲在午天災斯屬昔馬食土今牛饜菽匪徒牛饜菽犬
豕梁肉盛矣乎吾皇之德轉禍為福休哉德兮

歲星居心頌

并序

權德輿

皇上宅位六祀七政貞明於上七教敷聞於下其有不
迪不吉不庭不若之徒皆薰然而和晻然而化春三月
司天氏奏歲星居心宿五度其色黃明潤大光澤帝位
積五十餘日詔下有司頒示中外故臣得而言之以形
歌頌謹案歲星五帝為蒼五行為木五常為仁五事為
貌天意若曰時以至仁為理覆露萬民洽浹生類協夫
五行五事之用則發於星緯形於禎應陰陽大化昭報
成功玄符幽贊其昭昭如是禮運之論聖人以日星為

紀四時為柄洪範之叙皇極曰欽時五福用敷錫厥庶人
發於人格於天天人交感合若符節其年秋平河中之
寇葬其遺骸復其世祀班淮右之師用弘文告用去武
備此二帝三代所以恢令名也於是一統類以昭德明
法制以塞違薦禮百神賓懷獷俗嘉瑞美祥紛委狎至
置之而不有哲人端士連茹播職求之如已失然後端
拱於穆清怡神於靖冥驅一代為純誠接萬靈於明庭
斯又登邁遂古光昭聞見巍乎紹天統物之盛者也微

臣瑣賤沐浴仁聖敢獻歲星居心頌一章以備周詩由
庚由儀之闕頌曰

皇矣上帝降鑒下人后王承之制作禮文人用明德家
尚孝仁人無癘疵俗以阜蕃敷佑四方發為天祥重華
煌煌乃居明堂下煦仁澤上為祥光回復感通天人攸
同乃法五事乃建大中君君臣臣德輝昭融保佑命之
自天無窮微臣頌歌敢備唐風

伯夷頌

韓愈

士之特立獨行適於義而已不顧人之是非皆豪傑之士信道篤而自知名者也一家非之力行而不惑者鮮矣若至于一國一州非之力行而不惑者蓋天下一人而已矣若至於舉世非之力行而不惑者則千百年乃一人而已耳若伯夷者窮天地亘萬世而不顧者也昭乎日月不足以為明宰乎泰山不足以為高巍乎天地不足以為容當殷之亡周之興微子賢也抱祭器而去之武王周公聖也率天下之賢士從天下之諸侯而攻之

未嘗有非之者也彼伯夷叔齊乃獨以為不可殷既滅
矣天下宗周彼二子乃獨耻食其粟餓死而不顧由是
而言夫豈有求而為哉信道篤而自知明也今世之謂
士者一凡人譽之則自以為有餘一凡人沮之則自以
為不足夫彼獨非聖人自是如此夫聖人乃萬世之標
準也余故曰若伯夷者特立獨行窮天地亘萬世而不
顧者也雖然微二子亂臣賊子接跡于後世矣

唐文粹卷二十



總校官庶吉士

臣張能照

校對官庶吉士

臣翟槐

膳錄監生

臣胡容佐